

4) Opšti uslovi poslovanja sa depozitima fizičkih lica (v.1.5)

Uvodne odredbe: Ovi opšti uslovi primjenjuju se na standardne uslove poslovanja u vezi sa depozitima fizičkih lica povodom kojih zaljučuju ugovore sa Bankom.

Deponent je svako poslovno sposobno fizičko lice, koje stupa u poslovni odnos sa Bankom radi korišćenja usluga Banke, a koje nisu namijenjene njegovoj poslovnoj ili drugoj komercijalnoj djelatnosti.

Depoziti su novčana sredstva koja se deponuju na računima kod Banke sa ciljem štednje, a pod uslovima koji se definišu ugovorom sa Bankom u zavisnosti od vrste štednje kao proizvoda Banke. Depoziti mogu biti u domaćoj i stranoj valuti.

Deponent je fizičko lice koje uplaćuje novčani depozit na osnovu zaključenog ugovora sa Bankom. Jedan deponent može imati više depozita položenih u Banci.

Depoziti se mogu otvoriti:

- poslovno sposobnom punoljetnom licu
- punoljetnom licu pod starateljstvom u kojem slučaju u njegovo ime i za njegov račun ugovor zaključuje staratelj
- maloljetnom licu sa zakonskim zastupnikom ili starateljem u kojem slučaju u njegovo ime i za njegov račun ugovor zaključuje zakonski zastupnik ili staratelj
- maloljetnom licu koje je steklo ograničenu poslovnu sposobnost
- udruženjima i zajednicama građana (zajednica etažnih vlasnika, registrovana udruženja)

Vrste depozita mogu biti:

- po viđenju (a vista)
- oročeni

Depoziti po viđenju (a vista) su depoziti sa kojima Deponent slobodno raspolaže u okviru raspoloživog iznosa na računu. Depoziti mogu biti u KM, EUR i drugim valutama sa kursne liste Banke. Uz zahtjev za otvaranje računa Deponent dostavlja dokumentaciju koja je zakonom propisana.

Oročeni depoziti su depoziti koje Deponent polaže kod Banke na određeni period u kojem se odriče prava raspolaganja sredstvima, što znači da ugovor ne može biti jednostrano raskinut prije isteka perioda oročenja. U zavisnosti od perioda na koji se depozit oročava, valute i visine depozita, ugovara se i pripadajuća kamata.

Oročeni depoziti sa klauzulom raskidivosti su depoziti koji se oročavaju na određeni period, ali Banka može izuzetno odobriti prijevremeni raskid ugovora bez otkaznog roka, na osnovu pisanog zahtjeva Deponenta, ukoliko Deponent ima opravdane razloge za korištenjem depozita, a koje nije mogao predvidjeti u vrijeme zaključenja ovog ugovora i to: smrt člana porodice, bolest Deponenta ili člana njegove porodice, vanredno školovanje Deponenta ili člana njegove uže porodice, tjelesne povrede Deponenta ili člana njegove uže porodice, posljedice izvršenog krivičnog djela prema Deponentu koje imaju za posljedicu otuđenje, oštećenje ili umanjenje imovine, prekid radnog odnosa Deponente ili člana njegove uže porodice, promjena prebivališta ili boravišta Deponenta, značajnog oštećenje imovine Deponenta nastala kao rezultat slučaja, radnji trećeg lica ili vremenskih nepogoda, te nemogućnosti ispunjenja kreditnih, poreskih i drugih finansijskih obaveza koji mogu uzrokovati značajne finansijske teškoće za Deponenta. Pisani zahtjev za raskid ugovora Deponent dostavlja u bilo koju poslovnicu Banke, sa obrazloženjem nastale okolnosti koja opravdava raskid ovog ugovora. Banka može tražiti dodatnu dokumentaciju koja potvrđuje nastupanje opravdanog razloga za raskid ugovora

Pod članom uže porodice podrazumijevaju se: bračni/vanbračni supružnik, roditelji, djeca (rođena u braku, van braka, zakonito usvojena, pastorčad i djeca uzeta pod starateljstvo ili na izdržavanje), te član domaćinstva. Pod članom porodice, osim članova uže porodice smatraju se i slijedeća lica: majka, otac, očuh, maćeha, usvojlac, djed i baba po majci i po ocu, braća i sestre, te njihova djeca.

Oročeni namjenski depoziti služe kao instrument obezbjeđenja ugovora o kreditu, kreditnih kartica i sl. i ugovaraju se sve do potpunog izmirenja obaveza iz ugovorenog posla koji je obezbijeđen depozitom.

Oročeni depozit sa automatskim obnavljanjem perioda oročenja je depozit sa jednokratnom uplatom na određeni period, uz mogućnost automatskog obnavljanja na isti period, pri čemu je svaki period zaseban. Banka, najkasnije 15 (petnaest) dana prije isteka perioda oročenja dostavlja Deponentu obavještenje u pisanom obliku ili na drugom trajnom nosaču podataka (email, sms ili druga vrsta elektronske poruke) o dospijeću novčanog depozita, roku na koji se produžava ugovor o novčanom depozitu i visini kamatne stope. Kamata od perioda do perioda može biti različita, ali je unutar važećeg perioda oročenja nepromjenjiva tj. fiksna. Deponent ima pravo da ne prihvati automatsku prolongaciju što za posljedicu ima raskid ugovor koji djeluje od datuma isteka predhodnog perioda oročenja. Najkasnije u roku od 15 (petnaest) dana od dana prijema obavještenja Deponent je obavezan dostaviti Banci pisanu instrukciju o načinu disponiranja novčanim sredstvima. Ukoliko Banka nije zainteresovana za produženje ugovora, o tome obavještava Deponenta najkasnije 15 (petnaest) dana prije isteka perioda oročenja. Banka će dostaviti klijentu informaciju o uslovima produženja, te plan isplate depozita na jedan od slijedećih načina:

- elektronski (putem email-a)
- pisanim putem na adresu Deponenta ili
- ličnim uručenjem Deponentu ili od njega ovlaštenom licu, u poslovnicu Banke.

Sigurnost depozita

Osnovne informacije: Depozite u Banci osigurava Agencija za osiguranje depozita Bosne i Hercegovine. Kontakt: Agencija za osiguranje depozita Bosne i Hercegovine, Vase Pelagića 11a, 78 000 Banja Luka, Bosna i Hercegovina, telefon: 00387 051 223 440, faks: 00387 051 223 452, E-pošta: aod@bih.net.ba. Informacije dostupne na web stranici: <https://www.aod.ba>

Maksimalan iznos depozita koji se osigurava je 70.000,00 KM po deponentu po Banci, uključujući pripadajuću kamatu obračunatu do dana nastupanja slučaja osiguranja koji odgovara datumu oduzimanja dozvole za rad banci. Depozit se umanjuje za dugove koje deponent ima prema banci na dan kada joj je oduzeta dozvola za rad.

Osiguranje depozita se ne određuje po osnovu pojedinačnog računa, što znači da se svi depoziti deponenta u jednoj banci zbrajaju a ukupan osiguran iznos je ograničen na 70.000,00 KM. Depoziti jednog deponenta u različitim bankama su odvojeno osigurani svaki do iznosa 70.000,00 KM.

Isplata se vrši u valuti KM. Sva sredstva deponenta u stranoj valuti preračunavaju se u KM na osnovu srednjeg deviznog kursa Centralne banke Bosne i Hercegovine na dan slučaja osiguranja.

Zajednički račun je račun koji posjeduju dvije ili više osoba. Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa, osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos 70.000,00 KM po jednom deponentu po banci.

Nadoknada: Sistemom osiguranja depozita u Bosni i Hercegovini upravlja Agencija za osiguranje depozita Bosne i Hercegovine (AODBiH). AODBiH je dužna da sve iznose osiguranih depozita stavi na raspolaganje deponentima, bez neopravdanog kašnjenja, najkasnije u roku od 20 radnih dana od dana oduzimanja dozvole za rad banci.

Kako bi ostvarili pravo na iznos osiguranog depozita deponenti, uz zahtjev za isplatu, moraju dostaviti dokaz zakonskog vlasništva nad depozitom za koji se potražuje nadoknada. Zahtjevi za isplatu potraživanja deponentata zastarijevaju u roku od pet godina od dana gubitka dozvole za rad banke.

Sistem osiguranja depozita štiti depozite fizičkih i pravnih lica u banci, osim isključenja u skladu sa članom 6. Zakona o osiguranju depozita u bankama Bosne i Hercegovine. Prikadni depoziti ne uključuju sljedeća sredstva:

- Depoziti za koje je odlukom suda utvrđeno da su stečeni protuzakornim radnjama i koji nisu predmetom daljnje žalbe

- Depoziti koji se drže na računima čiji naziv nije transparentan u smislu vlasništva ili nenominirani depozit
- Depoziti koji se čuvaju u sefovima banaka
- Depoziti koji se čuvaju u aranžmanu pohrane sa bankom, osim namjenskih depozita
- Depoziti domaćih ili inozemnih banaka koje drže u svoje ime i za svoj račun
- Depoziti domaćih ili inostranih vladinih organa
- Depoziti domaćih i inostranih osiguravajućih društava
- Depoziti domaćih i inostranih organa za kolektivna ulaganja
- Depoziti domaćih i inostranih penzionih fondova koji se ne smatraju vladinim organima
- Depoziti osoba u posebnom odnosu sa bankom, kako je to utvrđeno entiteskim zakonima o bankama
- Depoziti privrednih društava iste skupine kao i banka članica
- Depoziti koje je deponent stekao od iste banke članice prema stopama ili drugim finansijskim ustupcima koji su mogli doprinjeti ugrožavanju finansijskog stanja banke članice
- Depoziti poduzeća koja mogu biti isključena iz pokrića osiguranja nekim posebnim zakonom ili vladinom instrukcijom
- Dužnički vrijednosni papiri koje je izdala banka članica i sve druge obaveze banke članice koje proizilaze iz takvih akceptnih naloga i mjenica
- Depoziti mikrokreditnih organizacija

Druge važne informacije: Sve banke koje imaju dozvolu za rad dobijenu od strane Agencije za bankarstvo Republike Srpske i Agencije za bankarstvo Federacije Bosne i Hercegovine su obavezno članice sistema osiguranja depozita u Bosni i Hercegovini. Kako bi osigurale depozite banke su dužne da plaćaju premiju osiguranja depozita AODBiH. Premiju osiguranja ne plaćaju deponenti.

Kamate: Banka utvrđuje kamate za svaku vrstu depozita kao proizvoda Banke. U važećim tarifama Banke podaci o kamatama na depozite dostupne su Deponentima u svako vrijeme na svim šalterima Banke. Kamatne stope mogu biti fiksne i promjenjive, u zavisnosti od proizvoda Banke.

Visina kamatne stope, uslovi promjenjivosti, način obračuna, isplata kamate, detaljnije se regulišu ugovorom. Klijent u svako doba može tražiti da mu Banka stavi na raspolaganje nacrt ugovora te može od službenika Banke tražiti dodatne informacije i objašnjenja.

Ukoliko je ugovorena promjenjiva kamatna stopa, Deponent se u pravilu obavještava o promjeni 15 dana prije primjene izmjenjene stope.

Ukoliko je ugovorena automatska prolongacija oročenja, prilikom prelaska u novi period kamatna stopa može biti izmjenjena.

Metod obračuna kamata je proporcionalni tj. prosti metod obračuna uz korišćenje stvarnog broja dana u godini.

Efektivna kamatna stopa (EKS) predstavlja visinu redovne nominalne kamatne stope umanjenu za iznose naknada, a uvećanu za iznose premije koje Banka zaračunava Deponentu Korisniku prilikom prijema depozita i u toku trajanja perioda oročenja, poznatih u vrijeme zaključenja ugovora. Sa EKS Deponent se upoznaje prije zaključenja ugovora, a uz ugovor mu se uručuje isplatan plan depozita, izuzev za depozite po viđenju (a vista).

Naknade: Specifikacija naknada i provizija za uslužne bankarske poslove i njihova visina sadržani su u važećim cjenovnicima Banke.

Naknade koje se mogu pojaviti u toku poslovnog odnosa sa Deponentom spadaju u bankarske popratne uslužne poslove i izražavaju se kao naknade/provizije sadržane u važećem cjenovniku Banke koju je u svako vrijeme dostupan Deponentu u poslovnim prostorima Banke i na web stranici, a predstavlja promjenjivu kategoriju, jer se formiraju na bazi utroška materijala, kadrovskih i tehničkih resursa i trošku vanjskih usluga na koje Banka ne može uticati.

Opunomoćenici: Deponent može ovlastiti najviše dvije poslovno sposobne fizičke osobe za raspolaganje po depozitu, a putem pisanog ovlaštenja (punomoći) popunjenog i potpisanog od strane Deponenta u Banci (interna punomoć) ili ovlaštenja koja nije Deponent potpisao u Banci, ali su ovjerena od strane nadležnog organa (eksterna punomoć). Punomoć može biti izdata za jednu ili više radnji po depozitu. Ukoliko je izdata eksterna punomoć, ovlašteno lice je obavezno

svaki put je prezentovati Banci za obavljanje bilo koje radnje, a Banka će odložiti fotokopiju punomoći u svoju arhivu. Deponent snosi punu odgovornost za radnje poduzete od opunomoćenika. Ovlaštena osoba ne može imati veća prava u raspolaganju sredstvima nego Deponent.

Štedna knjižica: Štednu knjižicu Banka izdaje Deponentu za štednju po viđenju i za specifične oročene novčane depozite (uloži na koje se u toku trajanja ugovorenog roka mogu vršiti uplate/isplate) i u istu se upisuju podaci o Deponentu i opunomoćenicima te sve izvršene finansijske promjene.

U štednu knjižicu se unose sve uplate i isplate novca sa štednog uloga. Upisi potvrđeni pečatom Banke i potpisom ovlaštene osobe su dokaz o izvršenim uplatama i isplatama.

Zamjena štedne knjižice se vrši kada se popuni u cjelosti, kada je oštećena, kao i kada je ukradena ili izgubljena pri čemu Deponent o svom trošku treba provesti postupak objave nevažeće knjižice i dostaviti Banci potvrdu o tome.

Prije izdavanja zamjenske knjižice, vrši se sravnjenje stanja prema analitičkoj kartici, te se takvo stanje upisuje u novu knjižicu.

Neaktivni računi: Neaktivni računi su oni računi (izuzev računa oročenja sa automatskim produženjem) na kojim nije bilo aktivnosti deponovanja ili povlačenja sredstava sa računa, urađenih ili zadanih od strane vlasnika, zakonskog zastupnika i druge ovlaštene osobe u periodu od 12 mjeseci nakon isteka ugovorenog roka oročenja. Neaktivni račun se ponovo aktivira radnjom klijenta koje imaju za posljedicu deponovanja ili povlačenje sredstava sa računa, s tim da će Banka izvršiti ponovnu provjeru identiteta klijenta u slučaju aktiviranja računa, a klijent je dužan priložiti potrebnu dokumentaciju kao da otvara račun u skladu sa standardima sprječavanja pranja novca i finansiranja terorističkih aktivnosti. Banka obračunava kamatu na neaktivne račune kao kamatu za aktivne račune, te naplaćuje mjesečnu naknadu za održavanje neaktivnih računa.

Banka će vršiti zatvaranje neaktivnih računa sa stanjem na računu u iznosu manje ili jednako +20,00KM/-20,00 KM jednom godišnje. Ukoliko vlasnik računa naknadno traži isplatu sredstva koje je imao na računu Banka će isplatiti ista sredstva na račun klijenta u Banci.

Banka neće zatvarati sljedeće račune:

- oročene depozite kod kojih je ugovoreno automatsko produženje ugovora o oročenju nakon isteka ugovorenog roka;
- Račune koji su u pravnom postupku (naplata prisilnim putem ili blokada)
- Račune koji su vezani za bilo koje druge račune u banci.

Zatvaranje računa: U slučaju otkaza ugovora, Deponent može na svoj zahtjev, a nakon izmirenja obaveza po računu, bez naknade prenijeti sredstva u drugu banku ili podići u gotovini i ugasiti račun.

Banka može onemogućiti raspolaganje računom ili otkazati ugovor Deponenta kojem je isteklo važenje ličnog identifikacionog dokumenta koji je prezentovan Banci prilikom zasnivanja ugovornog odnosa ili u toku njegovog trajanja, ukoliko Deponent ne dostavi Banci novi važeći identifikacioni dokument u roku od 30 dana od slanja poziva Banke.

Banka će poziv za dostavljanje kopije važećeg dokumenta iz prethodnog stava, uputiti Korisniku na poslednju poznatu adresu koju je Deponent dostavio Banci, odnosno putem elektronske pošte ili sms usluge ukoliko Deponent koristi takvu vrstu komunikacije sa Bankom, čime se dostavljanje poziva smatra izvršenim.

Ostale odredbe: Ovi opši uslovi su sastavni dio Opštih uslova poslovanja Banke i ugovora kojeg zaključuje Banka i klijent, kao i sve naknadne promjene opštih uslova, koji su dostupni u poslovnim prostorijama i na web stranici Banke.